

03 JUN 2003

BPM-PROMOSI

BANK PERTANIAN MULAKAN PROMOSI SKIM KREDIT MIKRO ESOK

KUALA LUMPUR, 3 Jun (Bernama) -- Bank Pertanian Malaysia (BPM) akan mengadakan promosi besar-besaran bagi memperkenalkan Skim Kredit Mikro di peringkat negeri mulai esok.

Promosi ini akan turut dijalankan di balai raya, sekolah dan masjid di kawasan-kawasan pedalaman, kata pengerusi BPM, Datuk Sulaiman Daud, di pelancaran Skim Kredit Mikro di ibu pejabat bank pembangunan itu di sini hari ini.

Fasa pertama skim tersebut akan melibatkan pembiayaan RM200 juta, katanya.

BPM adalah antara institusi kewangan yang dipilih kerajaan bagi melaksanakan Skim Kredit Mikro yang melibatkan penyediaan dana RM1 bilion. Skim itu diumumkan Perdana Menteri Datuk Seri Dr Mahathir Mohamad pada 21 Mei lepas.

Daripada dana RM1 bilion yang disediakan itu, RM500 juta akan disalurkan untuk peniaga kecil di bawah BPM dan RM300 juta diletakkan di bawah Bank Simpanan Nasional (BSN). Dana RM200 juta lagi disalurkan sebagai tambahan kepada dana Amanah Ikhtiar Malaysia (AIM) yang diletakkan di bawah BPM.

Sementara itu, pengurus besar BPM, Datuk Mohd Rosli Aziz, berkata melalui skim tersebut, modal disediakan kepada usahawan yang menjalankan aktiviti pengeluaran, pemprosesan dan pemasaran dalam sektor pertanian.

Asas pembiayaan yang ditetapkan ialah projek berdaya maju dan berasaskan kepada aliran tunai projek.

Buat masa ini, pembiayaan tanpa cagaran bagi pinjaman di bawah skim ini adalah berbentuk konvensional dan diberi seratus peratus daripada kos projek dengan jumlah maksimum RM20,000, katanya.

Pinjaman melalui sistem perbankan Islam akan diumumkan dalam masa yang terdekat, tambahnya.

Menurutnya, peminjam yang layak memohon adalah mereka yang berumur 18 hingga 60 tahun dan mempunyai lesen atau permit perniagaan yang sah.

Kadar faedah pinjaman yang dikenakan adalah empat peratus setahun atas baki bulanan dan pembayaran balik adalah berdasarkan aliran pendapatan.

Selain daripada Skim Kredit Mikro yang dikenalkan ini, BPM turut memberi pembiayaan lain seperti pembiayaan dana khas dan pembiayaan komersial. -- BERNAMA

WNA JR